

УДИРТГАЛ

Судалгааны ажлын үндэслэл:

Батлан хамгаалах салбарт 1960 онд анхны эрдэмтэн төрснөөс хойш өдгөө шинжлэх ухааны доктор 10 гаруй, боловсролын доктор 200 гаруй эрдэмтэдтэй болжээ.

Манай эрдэмтэн, судлаачид улсын захиалгатай шинжлэх ухаан, технологийн төслийн шалгаруулалтад 2003 оноос анх удаа оролцож, улмаар 2004 оноос хэрэгжүүлж эхэлснээс даруй 20 гаруй төслийн тайлан ихэвчлэн цаасан суурьтайгаар бүртгэгдсэн байна. Түүнчлэн Батлан хамгаалах яам, Зэвсэгт хүчний жанжин штабаас жил бүр судалгааны ажлыг батлан хамгаалахын сургалт, эрдэм шинжилгээний байгууллагаар гүйцэтгүүлж, тэдгээрийг батлан хамгаалах бодлого, үйл ажиллагаа, Зэвсэгт хүчний шинэчлэлийн шинжлэх ухааны үндэслэлийг тодорхойлох үйл ажиллагаандаа ашиглаж байна. Эдгээр судалгаа боловсруулалтын 300 орчим ажлуудын тайлангийн ихэнх нь цаасан суурьтайгаар хадгалагдаж байна. Иймд эрдэмтэн, судлаачдын доктор, магистрын судалгааны ажил, судалгаа боловсруулалтын ажлын тайлан, эрдэм шинжилгээний илтгэл, өгүүллийг электрон хэлбэрт шилжүүлж, судалгааны эргэлтийг нэмэгдүүлэхээс гадна зохиогчийн эрхийг хөндөж, хууль бусаар хуулбарлах ажиллагаанд хяналт тавих зэрэг шаардлага нь энэхүү судалгааны ажлын үндэслэл болж байна.

Монгол Улсын Засгийн газрын 2018 оны 282 дугаар тогтоолоор батлагдсан “Судалгаанд суурилсан их сургуулийг хөгжүүлэх хөтөлбөр”-ийн 3.1.4. “Докторын диссертаци, магистрын төгсөлтийн ажил, эрдэм шинжилгээний өгүүлэл, бусад бүтээлийг байршуулах эрдэм шинжилгээний мэдээллийн нэгдсэн сан байгуулах”, 3.1.5. “Оюуны бүтээлийн эрхийн хамгаалалтыг сайжруулах, бүтээлийн зөвшөөрөлгүй хуулбарлалтыг шалгах программтай болох замаар судалгааны ёс зүйн талаар хууль тогтоомжийн хэрэгжилтийг хангах нөхцөлийг бүрдүүлэх” гэж заасны дагуу их, дээд сургуулийн эрдэм шинжилгээ, судалгааны ажлыг мэдээллийн нэгдсэн санд төвлөрүүлэх бодлого барьж байна.

Сэдвийн судлагдсан байдал:

Шинжлэх ухаан, технологийн сан (ШУТС) нь Монгол Улсын Засгийн Газрын 1993 оны 192 дугаар тогтоолоор байгуулагдсан. ШУТС–д Мэдээллийн Технологи, Хамтын Ажиллагаа, Мониторингийн хэлтэс 2011 оны 9 дүгээр сараас эхлэн байгуулагдсанаар монгол эрдэмтдийн мэдээллийн нэгдсэн сан үүсгэн ажиллуулж байна. Тус мэдээллийн санд эрдэмтдийн танилцуулга, тэдгээрийн туурвисан диссертаци, эрдэм шинжилгээний тайлан, төслийн файлуудыг нэгтгэн нэгдсэн сан үүсгэсэн хэдий ч тухайн бүтээлийн зөвхөн товч танилцуулгыг илт хэлбэрээр байршуулсан байна.

2015 онд Батлан хамгаалахын их сургуульд “Эрдмийн зэрэг хамгаалуулах зөвлөл” байгуулагдсаны 20 жилийн ойд зориулан “Цэрэг, батлан хамгаалах, аюулгүй байдал судлалаар докторын зэрэг хамгаалуулах зөвлөл–20 жил” номыг доктор (Sh.D), профессор Б.Эрдэнэбат, доктор (Sh.D), профессор Д.Мягмар, доктор (Ph.D), профессор Б.Равжаа, доктор (Sh.D), профессор Ш.Паламдорж, доктор (Ph.D), профессор А.Түвшинтөгс, доктор (Ph.D) Б.Хандсүрэн, доктор (Ph.D) Б.Эрдэнэчимэг, доктор (Ph.D) Л.Баяр, Г.Ханджав нар туурвисан байна. Энэхүү бүтээл нь цэрэг, батлан хамгаалах, аюулгүй байдал судлалаар докторын зэрэг хамгаалуулах зөвлөлийн үйл ажиллагаа, хамгаалуулах зөвлөлийн гишүүд, хамгаалсан эрдэмтдийн болон БХИС–ийн эрдэмтэн багш нарын тухай түүхийг өгүүлсэн сургалт, судалгааны зориулалттай ном болсон байна.

Судалгааны ажлын зорилго:

Батлан хамгаалах салбарын эрдэмтэн судлаачдын диссертаци, судалгаа боловсруулалтын ажлын судалгаа хийж, электрон мэдээллийн санг үүсгэхэд оршино.

Судалгааны ажлын зорилт:

1. Батлан хамгаалах салбарын эрдэмтэн судлаачдын судалгаа хийх;
2. Батлан хамгаалах салбарын судалгаа боловсруулалтын ажлын судалгаа хийх;
3. Батлан хамгаалах салбарын эрдэмтэн судлаачдын диссертаци, судалгаа боловсруулалтын ажлын электрон мэдээллийн сан үүсгэх.

Судалгааны ажлын объект:

Батлан хамгаалах салбарын эрдэмтэн судлаачид;

Судлах зүйл:

Батлан хамгаалах салбарын эрдэмтэн судлаачдын диссертаци, судалгаа боловсруулалтын ажил;

Судалгааны ажлын шинэлэг тал:

Батлан хамгаалах салбарын эрдэмтэн судлаачдын диссертаци, судалгаа боловсруулалтын ажлын нэгдсэн судалгааг хийж, цахим мэдээллийн сангийн программ зохиосон нь судалгааны ажлын шинэлэг тал болсон.

Судалгааны ажлын практик ач холбогдол:

Батлан хамгаалах салбарын эрдэмтэн судлаачдын диссертаци, судалгаа боловсруулалтын ажлын нэгдсэн судалгааг хийж, мэдээллийн санг байгууллагын дотоод сүлжээний орчин болон интернетийн орчинд цахим хуудас хэлбэрээр ажиллахаар боловсруулсанд судалгааны ажлын практик ач холбогдол оршино.